

In d' Luur

## Wat is mit all uns Stinas und Abbos?

Van Karin Böhmer



De Oostfresen wussen dat all siet Johren, man nu is't amtlich: In Hannover worden se alltied vergeten. Denn wenn de Impf-Breven mit dat Sammelsurium van Adressen wegstüürt word, de de Post binannerfunnen hett, is dat Elend doch oftosehn. Blot Lüü, de all tachtig of oller sünd, sullen de Breev kriegen. Dat Meldeamt wull man in Hannover nich fragen. Daarum muss de Post kieken, wat se över hör Kunnen weet. Faken kennt de Post sogaar dat rechte Oller van de Lüü. Un um all de annern Ollen ok noch in de Adressenlist to finnen, is nah de Vörnaam keken worden. Is ja würelk so: Gifft'n paar Namen, de lang to d' Mood ut sünd. Man wat is mit all uns oostfreeske Vörnamen? Hett daar kieken över nahdocht? Well kann denn seggen, wo old en Jan Janssen is? Un all de Siebeltdines, Hemkeas, Weerts un Mee-nas, de Aaltjes, Abbos, Ennos, Stinas un Greetjes, de Boies, Casjens, Dietjes, Ebbas un Folines, daar is doch wiss nich rechtschapen nah keken worden! Kannst Lüü woll vör d' Kopp kieken un dat Oller taxeren. Man an en Vörnaam sücht man dat hier nich. Is nett as alltied: De Oostfrees mutt sük sülvst umdoon, dat he'n Impftermin kriggt. Se harren beter de Kusendokters fragen sullt, well woll al'n Gebitt hett. Man nu sitten wi daar mit'n Beck vull Tannen.